



# علم البلوت

## الكتاب الإلكتروني الأول لشرح البلوت

الشرح الإحترافي الأول من نوعية في الإنترنت، مدعم بالصور والشروحات والأمثلة.  
حاولنا الإلمام بجميع تفاصيل اللعبة الأكثر شعبية في المملكة العربية السعودية، ونرجو ان  
يحوز هذا الشرح المتواضع على رضاكم.. ونرجوا افادتنا بآرائكم برسائلكم عبر الإيميل.  
>>>كيف العربي فصحي بس

Mr. jo0j0o

Mr.jo0j0o@MSN.com

vb.SH67H.NET

© Mr. jo0j0o لـ جميع الحقوق محفوظة

## كلمة الناشر

كل ناشر يقعد يتفلسف وبالأخير يقول نرجو أن تحوز على رضاكم .. >>مصدق انه ناشر  
والكلام اللي يكتبه كله خرابيط .. فليه ما نختصر ونقول نرجوا ان تحوز على رضاكم .. ؟؟

وشكر خاص لأخواننا في الله 🤗 لمساعداتهم القيمة في تطوير الكتاب 🤗 ..

K.S.A Phantom

و

BLACK eYe

إيه صح .. ونرجوا ان تحوز على رضاكم 🤗 ..

## المقدمة

المقدمة ؟! ..

هذا الكتاب .. لأي شخص 😊 أخويه سحبوا عليه 🤔 .. لأنه مايعرف يلعب بلوت .. 😊

لأي شخص يحس بفقدان رجولته 🤔 .. لأنه مايعرف يلعب بلوت 😊 ..

لأي شخص مسكت في راسه يبي يعرف يلعب بلوت 🤔 ..

لأي امراه ولا بنت 😊 ودها تدخل عالم الشباب 🤔؟! وتعرف عن البلوت .. 😊

لأي إنسان مافهم اي شي من الشروح اللي بالمنتديات 🤔 شرح ابو نص ريال .. 😊

وباختصار هذي كانت المقدمة !! ،، 🤔

# الأهداف والملاحظات

من الأهداف اللي ودي تتحقق في من يقرأ هذا الكتاب 🏆 :

- معرفة تقريبا كاهه قوانين البلوت المتفق عليها (ياكثر القوانين المختلف عليها 🏆)
- بعض الحركات البدائية 🏆 اللي ممكن الواحد يستنتج منها أفكار وخبره من اللعب .
- فهم ان البلوت 🏆 لعبة تحتاج الى ذكاء + سرعة حفظ .. 🏆
- يقدر يلعب ويقدر يحسب النقاط 😊 .
- يعرف شلون يغش >> 🤨
- يدري انه إذا غش وكشفوه الفريق الثاني 😊 بينلعن خامسه من خويه والنقاط تروح للفريق الثاني كلها 😊 .
- يفهم وش معنى شراء، مشاريع، أشكل، تكويش، صن، حكم،... الخ (المصطلحات) 🤔

بعض الملاحظات اللي حطها في بالك يامن تقرأ الكتاب 🤔 :

- قوانين البلوت نوعين :
- قوانين اذا ما اتبعتهما تسمى غاش 🏆 وتخسر نقاط وهي 30% من لعبة البلوت.
- قوانين اذا ما اتبعتهما بتلعلن من خويك في اللعب فقط (واقصد بهذا النوع من القوانين هي اللغات السخيفه بدون تفكير ..وتخلي الخصم يفوز) 🏆 وهي 60% من لعبة البلوت.
- الـ 10% الباقية هي لعب لعبة خطره وانت موب متأكد منها ممكن تفوز وممكن تخسر.
- إذا فهمت كل شي موجود بالكتاب .. فهذا ما يتعدى 30% من قوانين البلوت كلها ..
- ولاتخاف ! في هذا الكتاب فيه بعض الأمثله للقوانين اللي بتلعلن فيها من خويك بس 🤔 😊 .
- الـ 60% + الـ 10% هذي .. ماتقدر تطورها الا مع اللعب والخطأ والإستنتاج من نفسك او من الغير .

🤔 الأرقام تقريبيه ترا

# البلوت


🎮 لعبة من العاب الورق كأي لعبة ثانية.. لكن قوانينها الكثيره والنادرة هي اللي خلت لها شعبية كبيرة وممتعة . البعض ممكن يقول البلوت صعبه 😞 !! ولا مستحيل اتعلمها 😞 !! أو مشوارر يبالغى سنيين اتعلمها 😞!!؟؟

بس لا تخافون .. البلوت زي الكورة !! تخيل ان ما عمرك شفت كوره !! ولا لعبت فيها؟! ولا تدري وش له هي؟؟ .. 🎮 شلون اول ما يناول لك احد الكوره؟؟ ..

بتقدر تلعب أو تتدرب وتصير (🎮 ذو) خبره عن طريق قراءة كتاب بس ؟ او احد يقرأ لك؟؟ .. مستحيل طبعا .. صح ؟ 😊 ..

## المهم نرجع للبلوت .. !!

أوراق اللعب كلها 54 ورقة .. ورق البلوت 32 ورقة 🎮 يعني من كل نوع نستخدم ثمانية اوراق بس.



كل نوع 8 ورقات

كل نوع (شيريا ♣ -  
هاص ♥ - ديمن ♦ -  
سبيت ♠) له ..

32 ورقة

عدد اوراق البلوت  
المستخدمة في اللعب

مهم : لما اقول نوع الورق .. أعنى شيريا او سبيت او ديمن او هاص .. موب قصدي شايب أو بنت او ..

الخ !!

وهذي هي أوراق البلوت الـ32 مع مسمياتها ... مرتبه بالترتيب العادي للورق 😊 من اليسار لليمين .. بالأكبر (الكبير ياكل اللي أصغر منه ( .. وبالأخير فيه مثال ينطبق على جميع الأنواع لكيفية تسميه الأوراق نفسها ..


### ♠ السبيت ♠



### ♦ الديمن ♦



### ♣ الشيريا ♣



### ♥ الهاص ♥



مثال : سبعة الهاص ، ثمانية الهاص ، تسعة .. الخ ، ولد الهاص ، بنت الهاص ، شايب الهاص ، إكة الهاص

# أهم شيء لازم تحفظه زي اسمك !!

(هينا شرح مبسط فقط .. لكن الأهم انك تحفظ الترتيب .. وبعدين بيجي الشرح .. لا تخاف لو مافهمت وش السالفه )

الحكم والصن : هذولي نوعين أو قوانين لعب مختلفات .. الصن مافيه الا صن عادي بس !! .. 😊  
اما الحكم فيه حكم شيريا .. حكم سبيت .. حكم ديمن .. حكم هاص .. مافيه شيء اسمه حكم بس !! 😊  
وبتعرّفون بعدين ليه ..

مثلا لما يدخل واحد في نص لعبه بلوت 🏠 ..

ويسألهم .. شباب وش نوع اللعب ؟ .. يقول واحد صن !! 🏠 .. يعني القوانين اللي نمشي عليها وترتيب الورق (أهم شيء ترتيب الورق) ترتيب وقوانين الصن ..

ترتيب الورق يعني وش أكبر ورقه اللي تاكل الكل 😊 .. وبعدين اللي أصغر منها .. اللي تاكل الكل ماعدا اللي أكبر منها 😊  
.. >> ادري شرح بزران بس استحملوا ..

يعني أكبر ورقه في الصن 😊 تختلف عن أكبر ورقه في الحكم (مهما كان نوعه) !! ..

ممكّن لو كانت اللعبة صن تستفيد من اوراقك اللي معك أكثر !! .. ولو كانت حكم (مهما كان نوعه) .. يمكن تصير اوراقك متساوي شيء !! أو نص ونص موب مره .. أو العكس بعد 🏠 .. !!

وعشان كذا لازم تحفظ ترتيب الصن وترتيب الحكم (مهما كان نوعه ويكون نفس الترتيب) 🏠 زي اسمك عشان تقدر تقرر وش النوع اللي احسن لك .. وهذي هي بحطها هينا قبل ما اشرح اللعبة كلها ..



## ترتيب اوراق الصن

(الفرق بين ترتيب الصن وترتيب الورق العادي الـ10 بعد الإكّه فقط 🤪)



## ترتيب اوراق الحكم

(الفرق بين ترتيب الحكم وترتيب الصن الولد والتسعه يصيرون في الأول)



عشان تحفظون الحكم تذكروا انه يحب الأولاد .. عشان كذا اقوى شى فيه هو الولد 🤪 🤪

# البلوت باختصار (ادري بتقولون أمحق اختصار)

البلوت 🎮 بكل بساطة .. >> كل ذا الكلام اللي تحت وتقول بساطه ؟؟ 🎮

أول شي 🎮 لعبة يلعبها أربع اشخاص .. كل اثنين قدام بعض يعتبرون فريق واحد 🎮 .. يعني يساعدون بعض لكن ممنوع انهم يكلمون بعض او رموز أو اي شي .. ولا .. راح يعتبرون غشوا ((وياكثر من يغش 🎮))

ثاني شي 🎮 زي باقي ألعاب الورق اللي يفوز هو الفريق اللي ياكل أكثر ويكون ماكل اوراق كبيره 🎮 .. لأن كل ورقه لها نقاط معينه 🎮 تنحسب في آخر اللعبة 🎮 .. والورقه الكبيره عليها نقاط أكثر 🎮 .. واللي يجيب نقاط أكثر هو الفايز 🎮 .. زي مثلا الإكه 🎮 عليها 11 نقطه 🎮 لكن البنت لها ثلاث نقاط بس 🎮 .. وكيداً ..

ثالث شي 🎮 البلوت لها طريقتين لعب مختلفات عن بعض 🎮 وكل طريقه لها قوانينها المختلفه 🎮 .. ولها مميزاتها وعيوبها 🎮 .. والطريقتين هم "الحكم والصن" 🎮 .. واللي يحدد ايهم راح تلعبون فيه .. ممكن يكون اي شخص من الأشخاص الأربعة يطلب ان اللعب يكون نوع معين 🎮 .. وعشان ما يتطابقون اللاعبين وواحد يقول لا انا قلت ابي تلعب صن قبلك والثاني يقول لا انا قلت حكم قبلك 🎮 انحطت قوانين لإختيار وش اللعبة بتكون 🎮 يعني من أول واحد له الحق انه يختار .. ومن اللي بعده .. وإذا مايبي يختار 🎮 وش يقول ؟؟ .. وكيداً ..

رابع شي 🎮 لنستيق الأحداث شوي .. في الصن كل الأنواع (شيريا - سبيت - ديمن - هاص ) تكون قوتها وحده يعني قصدي 🎮 انه مافيه نوع اقوى من الباقي .. مثلا اوراق الهاص نفس قوة اوراق السبيت نفس الديمن نفس الشيريا 🎮 .. لكن الفرق في الأوراق نفسها .. ان الإكه اقوى من العشره 🎮 والعشره اقوى من الشايب .. وكيداً 🎮 .. لكن في الحكم غير 🎮 .. الحكم على حسب وشو الحكم (زي ماقلنا لكم مافيه شي اسمه حكم وبس ) لو كان اللعب مثلا "حكم ديمن" 🎮 .. اوراق الديمن كلها 🎮 تكون اقوى من اوراق الهاص والسبيت والشيريا

زي لو اقول لكم 🎮 فيه اربع عصابات 🎮 .. والعصابه الأولى هي اقواهم 🎮 يعني لو يجي واحد منهم .. وهالواحد يعتبر اضعف واحد في العصابه حقته (الأولى) 🎮 .. راح يقدر يسطر أي واحد من العصابات الباقيه .. حتى لو كان الرئيس حقها .. لأن كل افراد العصابه 🎮 حتى لو كان اضعف واحد 🎮 سيكون اقوى من اي احد من الباقيين في العصابات الثانيه .. 🎮

بس 🎮 لو أي واحد من العصابات الثانيه .. يروح يتطاق مع أي عصابه غير عصابته 🎮 .. هو بيتسطر 🎮 لو كان وشو 🎮 لأنه دخل في مطاقه موب قدها .. يقومون العصابه الثانيه يتحدون ويقلبون عليه .. ما عدا ان كان من العصابه القويه .. 🎮

>>> 🤔 يرحم امك لا عاد تجيب أمثله

زي ما قلنا 🤔 الحكم ديمن .. اضعف ورقه بالديمن 🤔 هي السبعه 🤔 .. بس اللعبة "حكم ديمن" راح تخلي اوراق الديمن فوق كل الأوراق 🤔 وسبعه الديمن تعتبر أكبر حتى من إكه الهاص 🤔 .. مع ان الإكه تعتبر اقوى شي في الهاص 🤔



# مراحل لعب البلوت

والحين بنشرح 😊 لعب البلوت من أول شي إلى آخر شي مع القوانين .. 😊 .. كأنا بنبدا نلعب ..

لعب البلوت ينقسم الى ثلاث مراحل 🏟️ :

مرحلة الشراء . (وهذي المرحلة التي تحدد اما ان يكون نوع اللعب "صن" أو "حكم" 🏟️)  
مرحلة اللعب . وفيها سوف (نتطرق 🏟️) الى خمسة أمور :

- إذا كان اللعب "صن"
- إذا كان اللعب "حكم"
- وش معنى انه يكون حكم من نوع معين؟؟ .. وهل يعطى مميزات اكثر لهذا النوع المحكوم عليه؟؟
- وش المشاريع وأنواعها .
- وش الدبل وقوانينه .

مرحلة الحساب . (مرحلة 🏟️ تجميع النقاط وتحديد الفائز)

- كيفية الحساب إذا كان اللعب "صن"
- كيفية الحساب إذا كان اللعب "حكم"

.

.

## مرحلة الشراء

🇸🇦 مرحلة الشراء هي المرحلة التي تحدد نوع اللعب .. وقوانين اللعب 🤖 .. وكذا تبدأ:

• أول شي أحد اللاعبين (ويسمى الموزع) يأخذ الورق ويخبصه 🤖 .

• ثاني شي الموزع يعطي اللي على يساره الورق عشان يقص .

○ (القص: حركة للتأكد من عدم غش اللاعب الموزع وتكون بعدة حركات يختار وحده منها اللاعب

اللي بيقص . ومن أمثله القص (يأخذ نص الورق من تحت ويحطه فوق، يختار ورقه إما الأولى أو

الأخيره لكي تكون هي الورقه المكشوفه على الأرض ، يختار إما أول ثلاث اوراق أو آخر ثلاث

أوراق ويعطيها أي لاعب يبي .. او .. او ... الخ) 🇸🇦

• يوزع الموزع ثلاث اوراق لكل لاعب ابتداءً باللي على اليمين، ثم يوزع ورقتين ورقتين إلى ان يصبح مجموع الورق عند كل لاعب 5 اوراق، ويكون فيه ورق زائد يوزعه بعد إنتهاء مرحلة الشراء ويوزع لكل لاعب 3 اوراق ما عدا لاعب واحد له ورقتين .

• إذا خلص التوزيع يقول الموزع "أول" ويعني ابتداء أول فرصه للي يبي يشتري الأرض 🤖 . وترا "لازم احد يحط ورقه مكشوفه على الأرض قبل ما يقول أول" 🤖 .. يحطها الموزع أو اللي يقص!!

○ (يشتري 🇸🇦 : موب يعني يشتري بفلوس .. يشتري يعني انه يأخذ الورقه اللي على الأرض ويحدد

نوع اللعب "صن ولا حكم" .. بمقابل إنه يأخذ ورقتين فقط في التوزيع الأخير وان فريقه لازم يجيب

نقاط اكثر من الفريق الثاني) .... (الأرض: بكل بساطه هالكلمه تعني الورقه المكشوفه على الأرض )

• البدايه تكون من اللي بعد الموزع على اليمين . اذا كان يبي يشتري الأرض يقول صن او حكم أول (ويكون نوع الحكم نفس نوع ورقة الأرض) ، اما اذا محتار ولا عنده ورق زين لا للصن ولا للحكم .. يقول "بس".

○ مهم : (في الحكم ترتيب ورق الحكم ينطبق على نوع الحكم المشتري فقط .. يعني لو قلت حكم في

الدوره الأولى (لما يقول الموزع "أول" هذي تسمى الدوره الأولى. ) والأرض كانت شيريا ♣️ ..

يعتبر النوع حكم شيريا ♣️ .. وترتيب الحكم "اللي حفظتم اياه 🤖" .. ينطبق على أوراق الشيريا ♣️

فقط .. وباقي الأنواع يكون ترتيب قوتها نفس ترتيب الصن .. ( وبأشرح هالנקطه بعدين)

- لو الموزع قال "أول" .. وكل اللاعبين قالوا بس .. وحتى الموزع مايبهيا .. في هذه الحالة يقول الموزع "ثاني" .. يعني ثاني فرصه لشراء الأرض . في دوره الثانيه ممكن الواحد يقول صن او حكم "ثاني" .. فقط .

- (حكم ثاني : الفرق بينه وبين حكم اول .. انه في حكم ثاني تستطيع اختيار نوع الحكم على كيفك .. ماعدا نوع ورقة الأرض .. يعني لو الأرض كانت ديمن .. وجت الدورة الثانيه .. وقلت حكم ثاني .. لك خيار انك تحدد نوع حكمك ياثيريا او سبيت او هاص .. ماتقدر تحكم ديمن .. لأنه راحت عليك الفرصه انك تحكم ديمن في اول دوره .. على عكس حكم أول .. الذي يجب ان يكون نوعه نفس نوع الأرض .. لو كانت الأرض تسعة شيريا ♣ .. وقال واحد حكم اول .. يكون اللعب حكم شيريا .. )

- لو الكل قالوا بس .. في الدورة الأولى والثانيه .. يعاد التوزيع مرة ثانيه .. ويوزع شخص آخر

بعض قوانين الشراء :

- الصن دائما أقوى .. يعني لو الأول قال ابوها (الأرض يعني) حكم أول .. اللي بعده يقدر يقول جبها صن ..
- اذا واحد قال ابوها صن .. اذا في واحد قبله .. يقدر ياخذها صن بداله ..
- اذا واحد قال صن .. مايقدر ياخذها صن بداله الا اللي قبله .. فلو كان هو الأول .. فمحد يقدر يشتريها صن بداله ..
- اذا واحد قال حكم يجب على الموزع التأكد ان مافيه احد بيبها صن .. لأن الصن اقوى ويقدر اي احد ياخذها بداله صن ..
- إذا لاعب قال حكم ثاني وتم توزيع الورق واللعب شاف اوراقه الجديده بدون ما يحدد وش نوع الحكم .. يلغى الحكم ويصير كأنه قايل صن ويلعبون صن .

- 🤔 **س1 : على أي أساس يقول اللاعب اللي يبي يشتري صن ؟ او حكم ؟ ..**
- 🤔 **ج1 : على حسب ترتيب الورق اللي عنده .. إذا كان عنده أوراق قويه في الصن .. يختار اللعب صن ..**

مثال: الموزع قال "أول" والأرض اكة هاص وانت اول واحد تختار اذا تبي تشتريها ولا لا .. وأوراقك كانت كذا :



وش رايك بتقول ??? ..

نشوف .. لو تقول حكم أول ! بيكون الحكم هاص .. وانت ما معك ولا هاص ما عدا الإكه اللي بتأخذها !! .. لأن ترتيب الحكم على النوع نفسه بس .. موب زي الصن ترتيب قوة الورق على الكل ما يفرق النوع ..

بس لو تقول صن !! .. بيكون عندك ثلاث إكه !! هاص وسبيت وديمن .. وعشرة ديمن بعد !! .. كلها تعتبر أقوى شي !!

## مثال على مرحلة الشراء .. 😊

مثال # :



.. وانت هذي كانت أوراقك :

الأرض كانت ولد الهاص



🎮 بتقول حكم أول بأعن شكلك 😊 ..صح انه الأرض هي ولد الهاص وفرصه انك تاخذها وتخليه حكم هاص..

🎮 لكن يا حمار اوراق الهاص فقط هي اللي بتكون القويه.. !! وانت ما معك الا سبيت .. ماراح يكون الولد

🎮 والتسعه اللي عندك لها فايده!! 😡 لأن ورق الهاص بس بيكون ترتيبه ترتيب الحكم والباقي ترتيب الصن.

🎮 يعني اذا حكم هاص .. السبيت بيكون أكبر شي هو الإكه .. بعدين العشره 🎮ووو ...الخ .. زي الصن .

🎮 يعني انتظر لين تجي الدور الثانيه 🤔 .. وقل حكم ثاني 🎮 .. وقل "نوع الحكم سبيت" 🎮 ..

🎮 عشان يصير ولد وتسعة السبيت وأكه وعشرة السبيت هي اقوى اربع اوراق من كل الأنواع 🎮وهي موجوده عندك .. يعني لو تلعب اي وحده منهم محد يقدر ياكلها .. لأن اللي اكبر منها بتكون عندك اصلا.

🎮 عساكم فهمتموا بس ..

## مرحلة اللعب ( الصن )

ترتيب الورق إن كان اللعب صن وينطبق هذا الترتيب على جميع الأنواع (ديمن شيريا .. الخ) .



**القوانين العامة والتي يجب اتباعها لو كان اللعب صن أو كان حكم (مهما كان نوعه) :**

- اللي يبدأ اللعب هو اللاعب الي على يمين الموزع وينتهي بالموزع 🙄
- كل إثنين قدام بعض يعتبرون فريق !! .. لكن مايصلح يتشاورون ولا يطلب احد من الثاني شي .. ولا يعتبر غش .. 😊 .. يعني لازم يفهمون بعض عن طريق مراقبة اللعب بس !!
- اللي حط أكبر ورقه يأخذ كل الأوراق الأربعة اللي انلعبت 🙄 ، وهو اللي يبدأ يلعب من جديد. وهكذا إلى ان تنتهي الأوراق كلها اللي مع اللاعبين 😊 .
- اذا أول ورقة لُعبت كانت مثلا (شيريا ♠) 😊 يجب على اللاعبين كلهم يلعبون شيريا !! ..

**القوانين اللتي يجب اتباعها عندما يكون اللعب صن فقط 🙄 :**

- لو فيه احد ما معه نفس نوع اول ورقه .. يقدر انه يلعب أي نوع ثاني 😊 .. لكن يصير كأنه بلا قيمة .. يعني حتى لو لعب ورقه من نوع ثاني وكانت اكبر من كل الأوراق .. ما تاكل
- لو أول لاعب لعب بنت الشيريا .. والثاني تسعة الشيريا والثالث ثمانية الشيريا والأخير مامعه شيريا ولعب إكة الديمن .. الإكه تصير بدون قيمه ولا تاكل .. اللي ياكل بنت الشيريا .. لأن اللعب اصلا كان شيريا وأكبر ورقة شيريا موجوده هي البنت .. وهذا ما كان معه فلازم يحط أي شي ثاني 😊 ويفضل انه يلعب ورقة ضعيفه لأنها مأكوله مأكوله.
- اذا أول لاعب لعب مثلا (ديمن ♦) الكل مجبر انه يلعب ديمن .. ماعدا اللي ما معه، مسموح له يلعب اي نوع آخر والباقيين لازم يلعبون ديمن .
- الشخص اللي ما كان معه (ديمن ♦) في اللعبة اللي تو .. ولعب نوع ثاني .. يسمى قاطع ديمن 😊 .. وهذا يدل انه مامعه ديمن 😊 .. لو انلعب كل شوي ورق ديمن .. أوراقه اللي يلعبها كلها تصير بدون قيمه 😊 .. لأن القطع في الصن أوراقه تصير بدون قيمه 🙄 ..

## مثال على الصن .. 😊

🎮 واحد من الفريق الثاني قال صن .. ولعبتوا صن 😊 .. واول واحد لعب هالورقه :



### شايب سبيت

وانت هذي أوراقك :



### وش تلعب؟؟

هينا يبدأ الجلد والهواش من خويك 😊 إذا لعبت لعبه بايخه ولا غبيه .. 😊 ..

بتقول ألعب العشره؟؟ 😊 لأنها اكبر من الشايب وتاكل ؟ 😊 .. اقول كل تراب ولو لعبتها والله لأجلد ابو من جابك .. 😊 ..  
ليه؟؟ .. لأن يا حبيبي 😊 فيه ورقه أكبر من عشرة السبيت (وهي إكه السبيت) .. وممكن تأكل عشرتك اللي فرحان فيها لما  
تلعبها .. 😊 .. وانت ما اتوقع انك تدري مع مين الإكه؟؟ 😊 .. ممكن تكون مع الفريق الثاني .. 😊 .. وتروح عشرتك  
القويه .. 😊 ..

بتقول ألعب إكه الديمن ؟ لأنها أكبر شي في الصن ؟ 😊 وبتاكل؟؟ 😊 .. بقول أول ورقه يا حمار وش هي؟؟ .. شيريا !!!  
.. يعني لازم تلعب شيريا !! .. ولو لعبت الإكه .. تصير بدون قيمه !! بياكلونها !! لأن نوع اللعب الحين موب ديمن 😊 ..  
وأي شي ينلعب غير الديمن ينوكل لأنه ما يآثر 🎮 .. فازين شي تلعبه هو ثمانيه السبيت .. لأنها ورقة صغيره .. ولو أكلوا  
الفريق الثاني بياكلون الثمانيه الصغيره ماتسوى شي .. أزين من لو ياكلون العشره .. وتروح ورقة قويه عليك .. 😊 ..



## مرحلة اللعب ( حكم )

ترتيب الحكم .. وهذا الترتيب ينطبق على نوع الحكم في اللعبة فقط! لو كانت اللعبة حكم شيريا .. هذا الترتيب ينطبق على اوراق الشيريا بس ..



إذا كان اللعب حكم سبيت .. ولد السبيت "للإختصار" يسمى ولد الحكم 😊 .. والبقية تسعة الحكم وإكة الحكم.. وهكذا  
بإختصار كل اوراق السبيت تسمى اوراق الحكم .. 😊

القوانين اللتي يجب اتباعها عندما يكون اللعب حكم من أي نوع (مثلا حكم سبيت ♠ عشان تفهمون) 🤔:

- الأوراق كلها يكون ترتيبها ترتيب الصن يعني أقوى شي هو الإكاه، ما عدا "السبيت ♠" يكون أقوى شي فيه هو الولد وبعده التسعة وووو .. نفس ترتيب الحكم 😊 ويكون هذا النوع أقوى من الأنواع الأخرى. يعني سبعة الحكم (يعني سبعة السبيت) تكون أقوى من إكة الديمن .. وتاكلها !! 😊 لأن اللعبة حكم .. وهي ورقة حكم 😊 .. وأوراق الحكم كلها حتى أصغر ورقه .. دائما أقوى من الأوراق الأخرى

(لازم تلعب .. لازم تلعب .. عشان تفهم أكثر مع خبره .. حتى لو مافهمت ابد .. مع اللعب بتفهم )

- الكل يجب ان يلعب نفس نوع الورقة اللي يلعبها اول واحد .. 😊 واللي مامعه نفس النوع .. لازم انه يلعب نفس نوع الحكم ( وهو السبيت ♠ في هذا المثال) 😊 موب زي الصن يلعب أي شي وإذا واحد مامعه نفس النوع .. ولعب حكم 🟢 يكون هو اللي ياكل 🟢 .. لأن اوراق الحكم دايم قويه 🟢 حتى في القطع 🟢 .. في الصن اللي يقطع تكون أوراقه بدون قيمه .. هينا غير 🟢

مثال: الحكم سبيت زي ما قلنا .. واول واحد لعب ديمن مثلا .. والثاني لازم يلعب ديمن .. ولعب ديمن 😊 .. وجا دورك .. وانت مامعك ديمن !!! ماتقدر تلعب أي شي 😊 .. لازم تلعب أي ورقة سبيت (نفس الحكم) ولا راح تعتبر غاش 😊



- إذا واحد ما معه نفس النوع 😊 .. بيصير لازم يلعب سبيت (نفس نوع حكم اللعبة) طيب لو صار ما معه نفس نوع الحكم بعد ؟!!.. 🤔 .. الحين يقدر يلعب أي نوع ثاني 😊 لكن راح يعتبر ماله اي قيمة .. (زي في الصن) يعني بس اوراق الحكم هي اللي تاكل اذا لعبتها في أي وقت ..

- إذا أول لاعب لعب سبيت (على اساس ان الحكم سبيت الحين) .. لازم اللي بعده يلعب ورقة سبيت أكبر من اللي لعبها اللي قبله (على حسب ترتيب الحكم) وهذا يسمى لعب طلوع 🏠 اذا واحد لعب ورقة حكم لازم انت "تطلع فوقه" يعني تلعب أكبر منه 🏠 .. لكن اذا أول واحد لعب ورقة ديمن لا يشترط ان اللي بعده يلعب ورقة أكبر 😊 .. على كيفه (لأن الحكم سبيت موب ديمن) 😊

- في الصن عندما يلعب واحد "ديمن" مثلا .. اللي مامعه ديمن ولعب اي ورقة ثانيه .. تكون الورقة بدون قيمه ولا تاكل .. 😊 اما بالحكم غير .. مثلا الحكم سبيت .. واول واحد لعب ديمن .. وانت مامعك ديمن .. اذا كان معك تسعة سبيت .. ولعبتها .. انت اللي تاكل (😊) الا اذا جا واحد ولعب ولد الحكم 😊 اذا فيه ورقتين من الحكم .. الورقة الأكبر-على حسب ترتيب الحكم- هي اللي تاكل) .. لأنها راح تعتبر أقوى شي .. في الحكم دائما الأوراق اللي نفس نوع الحكم .. تكون هي الأقوى 🏠

- إذا لعبت ورقة من أي نوع .. وكانت هي أكبر ورقة موجوده من نفس النوع 😊 يعني لو لعبت شايب ديمن .. وكانت إكة وعشرة الديمن غير موجودات يعني انهم انلعبوا من قبل ولايمكن لأحد ان يلعبهم مره ثانيه .. في هذه الحالة احسن انك تقول "إكه" لما تلعب الشايب .. وهذا يسمح لخويك اللي قدامك (لو ما معه ديمن) مايكون مجبور انه يقطع بحكم .. يعني مايكون مجبور انه لازم يلعب نفس نوع الحكم .. 😊 زي ماتعرفون اللي ما معه نفس نوع اللعب .. في الحكم لازم يلعب نوع الحكم .. وهذي الخاصيه تخليه يقدر يتخطاها 😊 .. يمكن يبغى يستفيد من الورقه بعدين 🏠 ..


أدري ان الحكم معقد 😊 .. بس مع اللعب بتفهمونه .. 😊

مثال على الحكم .. 😊

مثال #1 :

اللعب حكم ديمين 😊 .. وهذا مخطط لكل لاعب وش لعب .. السؤال مين اللي بياكل ؟ .. مين اللي لعب اكبر ورقه ؟ ..

اللعبة 1




**اللي بياكل هو :**

اللاعب رقم 4

**الملاحظة :** اول من لعب لعب بنت السبيت .. "يعني الكل لازم يلعب سبيت" .. اللي بعده لعب عشرة السبيت .. اما اللاعب الثالث إستنتجنا انه ماعنده سبيت .. عشان كذا مجبور انه يلعب نفس نوع حكم اللعبة اللي هو ديمين .. واللاعب الرابع نفس الحاله مامعه سبيت ولازم يلعب ورقة حكم .. ولعب الثمانية .. (أكبر من اللي قبله) ..

صحيح إن العشرة أكبر من الثمانية .. لكن دائما أوراق الحكم أقوى من الأوراق الأخرى .. 😊

## مثال #2 : اللعب حكم شيريا .. 😊



الرابع اللي ياكل 🍷 لأن الأوراق موب نفس نوع الحكم (موب شيريا 😊).. عشان كذا أكبر شي في الهاص هي الإكه 🍷 (ترتيب الصن) ..

## مثال #3 : اللعب حكم هاص ..



تلاحظون نفس الورق اللي تو 🍷 بس الفرق ان اللعب حكم هاص .. يعني الأوراق هذي نفس حكم اللعبه 🍷 .. اللي ياكل اللاعب الأول 🍷 لأنه لعب ولد الحكم 🍷 وهو أكبر شي في ترتيب الحكم .. (لي أماده ينسى 😊) .. ترتيب الحكم ينطبق على نفس نوع حكم اللعبه بس 😊 باقي الأنواع ترتيب صن). 🧑

# الدبل

إذا احد قال دبل 😊 : يعني اذا انتم تعديتونا بالنقاط .. حنا ناخذ صفر .. ونقاطكم تتدبل مرتين 😊 اما لو حنا تعديناكم بالنقاط .. تأخذون انتم صفر مهما كانت نقاطكم .. ونقاطنا تتدبل مرتين 😊 يعني تتضرب في 2

## بعض قوانين الدبل :

- الدبل مسموح من قبل الفريق اللي ما اشتري 🏆 يعني اذا الفريق 1.. قال حكم شيريا .. 🏆 الفريق 2 مسموح يقول نبي اللعبة دبل 🏆 ..
- طبعا مايصلح يجي واحد يقول صن .. ويجي خويه يقول دبل 🏆 ..كلهم فريق واحد .. وهم اللي قالوا صن 🏆 عشان كيذا الدبل بيد الفريق الثاني .. 🏆
- كثير من الناس 🏆 .. يقولون الدبل غير مسموح .. الا اذا كان الفريق الثاني عنده اكثر من 100 نقطه 🏆 .. على حسب الأشخاص.
- رأي الأغلبه في الدبل اذا اللعبة حكم 🏆 لما فريق يشتري حكم 🏆 والفريق الثاني يقول نبيها دبل .. 🏆 يكون دبل مقفل (مغلق)..يعني محد مسموح له يلعب أي ورقة من نوع الحكم.. الى ان تخلص جميع الأنواع الأخرى عنده
- مثال: 🏆 فريق #1 .. في مرحلة الشراء قال حكم ديمن 🏆 .. جا واحد من الفريق #2 قال دبل مقفل 🏆 .. يعني ممنوع لأي لاعب انه يلعب أي ورقه من نوع ديمن 🏆 لين تخلص الأوراق الثانيه 🏆
- مثال:2: 🏆 خلصت الأوراق من عند كل اللاعبين 🏆 .. وكانت اللعبة دبل .. 🏆 وراحوا يحسبون النقاط 🏆 وطلعت النتيجة .. الفريق #1: "7" الفريق #2: "9" 🏆 وكان الفريق 1 هو اللي شاري حكم 🏆 والفريق 2 قال دبل .. 🏆 .. تصير النتيجة .. الفريق 1 : "صفر" 🏆 .. الفريق 2 : 18 🏆

# المشاريع

المشاريع : 😊 اوراق معينه أو ترتيب ورق معين (على الترتيب العادي للورق بس ) 😊 .. اذا كان عندك في بداية اللعب 😊 .. تعلم الباقيين انه عندك قبل ما تلعب اي ورقه .. وبتحسب لك نقاط للمشروع بالآخر 😊 بس ..

أنواع المشاريع :

مشروع اربعميه "400" .. واذا كان عندك تقول "400" قبل ماتلعب اي ورقه .. (المشروع هذا في الصن فقط 😊)



متطلبات المشروع "🎯 يكون عندك اربع إكك 🎯"

--

**\*\*\*مهم :** في الصن 4 إكك 😊 .. تسمى "اربع ميه" بس .. اما لو اللعبة حكم .. غير 😊

--

مشروع مية "100" (صور) .. واذا كان عندك تقول "100" قبل ماتلعب اي ورقه .. 😊



متطلبات المشروع: يكون عندك اربع صور (اربع بنات أو اربع اولاد أو اربع شيايب أو اربع عشرات - فقط )

انا حظيت اربع شيايب فقط عشان مثال بس .. 😊 ينفع ترا اربع بنات اربع اولاد اربع عشرات 😊 ..

مشروع مية "100" (خمسه ورا بعض) .. واذا كان عندك تقول "100" قبل ماتلعب اي ورقه .. 😊

متطلبات المشروع: يكون عندك 5 اوراق متسلسلة بالترتيب من نفس النوع .. ((على حسب الترتيب العادي للورق ))




أو



أو



أو





مشروع خمسين "50" 😊 .. وإذا كان عندك تقول "50" قبل ماتلعب اي ورقه 😊

متطلبات المشروع: يكون عندك 4 اوراق متسلسلة بالترتيب من نفس النوع .. ((على حسب الترتيب العادي للورق ))



أكبر خمسين ..


أو




أو



أو



أو



أصغر خمسين ..



مشروع سرا 😊 .. واذا كان عندك تقول "سرا" قبل ماتلعب اي ورقه 😊

متطلبات المشروع: يكون عندك 3 اوراق من نفس النوع متسلسلة بالترتيب .. ((على حسب الترتيب العادي للورق))



أو



أو




أو

أو

أو

أو

وأصغر سرا هو هذا .. ويسمى سرا سياكل "يعني ارقام بس"



مشروع "مئة إك" بالحكم فقط .. وإذا كان عندك تقول "100" قبل ماتلعب اي ورقه .. ((المشروع هذا في الحكم فقط 🤪))



متطلبات المشروع "🎰" يكون عندك اربع إكك "🎰" لما يكون اللعب حكم فقط "لو كان اللعب صن تقول "400" ..

-----

مشروع "بلوت" .. وإذا كان عندك تقول "بلوت" 🤪 ((المشروع هذا في الحكم فقط))



متطلبات المشروع: يكون عندك (شايب وبنت) الحكم 🎰

إذا اللعبه حكم ديمن مثلا إذا عندك شايب ديمن وبنت ديمن 🎰 تقول بلوت 🎰 ..

- .
- .
- .
- .
- .

## بعض قوانين المشاريع :

- إذا لقيت عندك مشروع معين 🎁 تقوله إذا جا أول دور لك في اللعب 🎁 تقول اسمه قبل ما تلعب .. وإذا جا ثاني دور لك في اللعب 🎁 قبل ما تلعبه .. تنزل المشروع في الأرض عشان الكل يشوفه 🎁 .. وترفعه وتلعب 🎁 ..
- لو نسيت ان تذكر مشروعك في اول دور لك 🎁 راحت عليك نقاط المشروع 🎁 ولا تحتسب .
- لو نسيت أن تنزل المشروع حقك 🎁 قبل ماتلعب ثاني دور لك 🎁 راح عليك المشروع .
- لو قلت ميه واللي بعدك قال خمسين 🎁 الميه اكبر من الخمسين .. والميه هي اللي تحتسب فقط 🎁 ..
- اربع ميه اكبر شي وبعدين الميه وبعدين الخمسين وبعدين السرا ..
- بس لو انت قلت سرى .. واللي بعدك قال سرى 🎁 لا يحتسب السرى الأصغر .. | 🎁 ونفس الشي في الميه والخمسين .. اللي عنده أكبر سرى أو اكبر ميه أو اكبر خمسين هو اللي يحتسب مشروعه 🎁 ..
- لو احد قال نفس مشروعك 🎁 يعني انت قلت خمسين واللي بعدك خمسين 🎁 .. لازم تسأل اللي بعدك وشي خمسينك ؟ 🎁 عشان لازم فريق واحد بس هو اللي ينزل مشاريعه في الأرض 🎁
- اذا قلت ميه ولا خمسين ولا سرى وأحد سألك وشي منك مثلاً ولا وشو سراك 🎁 .. ماتقول كل الأوراق 🎁 .. تقول له أكبر ورقه في المشروع بس ..
- المشاريع اللي فيها ورق متسلسل زي الميه والخمسين والسرا 🎁 .. يكون التسلسل على حسب الترتيب العادي للورق .. وذكرته من قبل انا .. يعني أكه، عشره، شايب مايسمى سرا 🎁 .. لأن هذا ترتيب الصن موب الترتيب العادي 🎁 ..
- النقاط اللي تاخذها على كل مشروع بأذكرها في مرحلة الحساب 🎁 .. وبنقول كل مشروع كم له من نقطه 🎁 ..

# الحساب

Check please =P

ماراح اشرح لكم الحساب بالتفصيل، هذا شي تعلموه من اللعب .. لكن ابعطيكم فكره

الحساب ❤️ .. تحديد من اللي يفوز 🏆 .. عن طريق جمع النقاط اللي أكلها كل (( فريق )) .. 🏆 واللي نقاطه توصل 152

اول .. 🏆 يعتبر هو الفائز .. الفريقين يلعبون عدة صكات (اشواط) الى ان احد يوصل 152 🏆 .. يكون هو الفائز !!

🏆 نقاط كل ورقة من الأوراق، تقريبا نفس بعض لما يكون اللعب صن أو حكم .. لكن فيه اختلاف بسيط بينهم ..

🏆 في الصن لما يحسبون كل نقاط الفريق الأول يتم تقسيمها على خمسة عشان النتيجة النهائية.. اما في الحكم تقسيم على عشرة .. 🏆

مجموع النقاط في ورق الصن يبلغ 130 نقطة، وفي ورق الحكم يبلغ 162 نقطة

آخر أكلة باللعبه .. يعني لما مايبقى مع اللاعبين الا ورقة واحدة .. اللي يأكل هاأكله يضاف له 10 نقاط وتسمى "الأرض" .. يعني لما 🏆 يسألون بعض من اللي ماكل آخر أكله يقولون . الأرض لمين ؟

لا تستعجلون بتعرفون كل هذا بالصفحة الجايه 🏆

# الحساب إن كان اللعب صن

ذا جدول يوضح نقاط كل ورقه مع العلم ان نوع الورقه لا يهم !! (( ولد الشيريا نفس ولد الهاص نفس ولد السبيت ..الخ ))

الصن		
11 نقطة		
10 نقاط		
4 نقاط		
3 نقاط		
2 نقطة		
عديمة القيمة ( صفر )		
عديمة القيمة ( صفر )		
عديمة القيمة ( صفر )		

## طريقه التسجيل بعد عد النقاط ..

تلاحظون المجموع 30 نقطه .. نضربها في اربعة ((عشان فيه اربع اوراق من كل نوع ♠️♦️♣️♥️)) 🤪

يصير المجموع 120 نقطه 🤪

زائد عشر نقاط للأرض 🤪 يصير المجموع 130 نقطه 🤪 ..... ( الأرض يعني آخر أكله )

🏠 لكن في التسجيل ما تتسجل نفس كذا وبس !! .. لازم نشوف النقاط كم فيها من خمسه ؟؟ .. يعني نقسمها على خمسه ..

يعني  $130 / 5 = 26$  🏠 .. يعني الزبد نقاط الصن 🏠 26 نقطه .. بس حبيت اعلمكم شلون صارت 26 🏠

ترا تحسون انه معقد الحساب .. بس لا عادي يعني مثلا لو نبي نحسب نقاط الفريق الأول .. نروح ناخذ الأوراق اللي ماكلينها هم ..

ونعد كم نقطه .. واذا آخر أكله لهم نزود عشره .. واذا عندهم مشروع خمسين او اي مشروع نزود النقاط له .. وونقاط المشاريع بتجيكم بعدين ..

واذا لو مثلا بالأخير صارت النقاط 90 نقطه .. نقسمها على خمسه (عشان اللعب صن) تصير 18 ..

وبس خلصنا .. تصير نقاطهم 18 .. والفريق الثاني نفس الشي ..

ونقسم النقاط على 10 .. (اذا كان اللعب حكم ) .. يعني مثلا فريق جاب 100 نقطه ..


اذا كان اللعب صن .. تكون نقاطهم 20 .. اذا اللعب حكم .. نقاطهم 10 بس ..

بس لوتبون طريقه مختصره تحسبون فيها الفريق الثاني .. شوفوا كم نقاط الفريق الأول بدون المشاريع .. مثلا لو يكون 12 ..

🏠 .. نقصوا 12 من 26 .. ويطلع نتيجته الفريق الثاني .. بيكون بهالحاله 14 .. بس .. ثمين زودوا المشاريع ..

# الحساب إن كان اللعب حكم

ذا جدول يوضح نقاط كل ورقه مع العلم ان نوع الورقه لا يهم !! (( ولد الشيريا نفس ولد الهاص نفس ولد السبيت ..الخ ))

الصن		
20 نقطة		
14 نقاط		
11 نقاط		
10 نقاط		
4 نقاط		
3 نقاط		
عديمة القيمة ( صفر )		
عديمة القيمة ( صفر )		



## نقاط المشاريع

المشروع	نقاطها
اربع ميه (في الصن فقط)	400
ميه (سواء صور او تسلسل أو اربع اكك في حاله الحكم )	100
خمسين	50
سرا	20

يعني من الشرح اللي قبل .. اتوقع فهمتوا .. انه لما تكون اللعبة صن ..

مشروع خمسين .. يعتبر نقاطه 10 .. وفي الحكم 5 .. ومثلا ال ميه بالصن 20 .. وبالحكم 10 ..

،

،

بس هذا باختصار يعني .. عطيتكم لمحاه عن الحساب .. >> كل هذا وبإختصار بس !!؟؟

# النهاية ..

.. وصيتي لكم، التدريب ثم التدريب ثم التدريب ..

ولا تكرهون بعض ..

🕌 .. ولا تسحبون على ام المسجد ولا الصلاة ولا قسمن منتب متعلمين شي ابد

🕌 .. وحاولوا احيانا "تغامرون" وتلعبون مع شيايب

🕌 واذا كنتم تسألون ليه اسمها مغامره .. بتعرفون لا خلصتوا لعب ..

،

،

🕌 وفيه مصطلحات وبعض الأشياء، اللي "أفضل" انك تتعلمها اثناء اللعب ..

وانتبهوا لنفسكم يا أخواني ..

وقسموا الورث بالعدل



،

،

ماراح تستفيدون بدون تدريب، واحسن انك تقرا .. وتسأل بنفس الوقت واحد فاهم ..

🏠 واعتذر ان كان فيه غلط سقط سهواً بالمجلد هذا .. وارجوا انه يوضح على رزاكم

،

،

ولأي نصائح، ملاحظات، إضافات .. أتمنى انكم تكتبونها وترسلونها على الإيميل .. برسالة.

ولحد يضيف ويقول مافهمت اشرحلي .. صح شرحت 30 صفحه .. بس منيب جمعيه خيريه عاد 🏠

العالم يتعيجزون يشرحون وانتم قدامهم .. شلون بالسمنجر 🏠

،

،

🏠 واحبكم

-

قروب ابو نواف

دار المنفلوطي للنشر

-

تحياتي،

كان معكم الفقير الى ربه ..

Mr. jo0j0o

مع السلاحف ..